

漢書疏證

漢書疏證卷二

吳 沈欽韓撰

文帝紀第四

立爲代王

史記呂后紀趙王恢自殺太后使使告代王欲徙王趙王謝願守代邊

兆得大橫

史記龜策傳卜先以造灼鑽鑽中已又灼龜首各三又復灼所鑽中曰正身灼首曰正足各三其兆有首仰足開胎橫安吉橫吉上有仰下有柱大吉此云大橫得大

吉兆也

入代邸

西京雜記文帝自代還有良馬九匹皆天下之駿馬也有來宣能御代王號爲王良俱還代邸

大將軍臣武

服虔曰武柴武錢大昭曰考高五王傳呂產遣大將軍潁陰侯灌嬰將兵擊之灌嬰傳呂祿等以嬰爲大將軍觀元年詔止有太尉勃丞相平將軍嬰而無名武之大將軍則其爲灌嬰何疑至武爲大將軍在文三年濟北王反時服氏謂文帝卽位之初卽有大將軍柴武失之

遠矣愚按史記將相名臣表高后八年隆慮侯竈爲將軍擊南越南粵傳云高后崩卽罷兵此武蓋竈之訛也灌嬰尙屯滎陽

陰安侯

一統志陰安故城在大名府清豐縣北二十里

西向讓者三

御覽

四百二十四

周書曰湯三讓於諸侯莫敢卽位與今殷

祝解異博物志三讓一曰禮讓二曰固讓三曰終讓

女子百戶牛酒

師古說襲姚察然長男得爵妻得牛酒而次丁與妻並

不及非普洽之惠也章懷太子注後漢紀知其不可通
遂以爲此是女戶頭唐律疏議戶內並無男夫直然女以女人爲戶其終則爲絕戶
戶甚少百戶共賜如何分布愚以爲只就鄉亭中百戶
率得牛一頭酒十石不限有爵無爵之妻

酺五日

說文酺王德布大飲酒也周禮族師春秋祭酺注故書
酺或爲步杜子春云當爲酺族長無飲酒之禮因祭酺
而與其民以長幼相獻酬焉按古者無事不飲酒酒詒
曰祀茲酒故假祭名以飲酒因謂賜民飲酒爲酺又禮
器注合錢飲酒爲酺王居明堂之禮仲秋乃命國酺賈

公彥云州長黨正飲酒禮皆得官物爲之族師卑不得官物爲禮鄭據禮器明堂禮皆有醑法以不得官物故須合錢耳然此賜醑卽是合錢醑飲也

元年當稟鬻米者

呂氏春秋養衰老授几杖行糜粥飲食高誘曰今之八

月比戶賜高年鳩杖粉粢

魏志注魏略尾累縣官以其孤老給廩日五升又寒貧者

本姓石字德林郡縣以其鰥寡給廩日五升此漢魏受廩有常額也

遣都吏循行

續志注律有無害都吏如今言公平吏列女羊叔姬傳

攘羊之事發都吏至

二
憫然

說文憫愉也非此義昭十八年執事憫然授兵登陣杜預云憫然忿勁貌服虔云憫然猛貌按方言憫猛也晉魏之閒曰憫此服氏所據也詩作憫說文云武貌荀子榮辱篇陋者俄且憫也楊倞注憫與憫同猛也楊據漢書此文故云與憫同然非也

春正月丁亥詔曰

通典

吉禮六

齊武帝永平中耕藉田用丁亥王儉以爲亥

日藉經紀無文助教周山文議曰蔡邕月令章句解元辰云甲幹也辰支也有事於天用甲有事於地用辰何

佟之云漢文用於此日耕藉祠先農後王相承用之非有別義

朝有進善之旌

管子桓公問舜有告善之旌而主不蔽也淮南主術堯置敢諫之鼓

誹謗之木

崔豹古今注程雅問曰堯設誹謗之木何也答曰今之華表以橫木交柱頭狀如華形似桔槔大路交衢悉施焉或謂之表木以表王者納諫亦以表識衢路秦乃除之漢始設焉今西京謂之交午柱淮南主術舜立誹謗

之木高誘云書其善否於表木也

銅虎符竹使符

周禮典瑞注鄭司農云牙璋發兵若今時以銅虎符發兵杜子春云珍圭徵守者若今時徵郡守以竹使符也按信陵君傳如姬竊得魏王兵符與公子奪晉鄙軍隋書紀煬帝幸遼東命衛玄爲京師留守樊子蓋爲東都留守俱賜玉麟符以代銅虎唐六典後魏有傳符歷北齊隋皆用之武德初爲銀龜符後改爲銅魚符以起軍旅易守長其傳符以給郵驛通制命

太子監國曰雙龍之符左右各十京

都留守曰麟符左二十右十九東方青龍符西隨身魚方驛虞符南方朱雀符北方元武符左四右三

符以明貴賤應徵召

左二右一太子以玉親王以金庶官以銅皆題云某位姓名其官只

有一員者不復著姓名並以袋盛其袋三品以上飾以金五品以上飾以銀

冊府元龜

四百七十

五

後唐長興元年給事中崔行奏內庫每州有銅魚八

隻一隻大七隻小兩隻右五隻左其右銅魚一隻長留

在內留一隻在本州庫逐季申報平安左魚五隻皆鐫

次第字號每新除刺史到任後卽差人到當省請領左

魚當司覆奏內庫次第出給左魚一隻當省責領分符

到州集官吏取州庫右魚契合卻差人送左魚納省如

別除刺史州司又請次第左魚周而復始按竹使符則

後世木契之制也六典木契所以重鎮守慎出納

軍駕巡幸

皇太子監國有兵馬受處分者爲木契若王公以下兩京留守及諸州有兵馬受處分并行軍所及領兵五百人以上馬五百匹以上征討亦各給木契其在外及行用法式並準魚符王畿之內左右各三王畿之外左右各五庶官鎮則左右各十宋史兵志康定元年頒木契上下題某處契中剖之上三枚中爲魚形題一二三下一枚中刻空魚令可勘合左旁題云左魚合右旁題云右魚合上三枚留總管鈐轄官高者掌之下一枚付諸州軍城砦主掌總管鈐轄發兵馬百人以上先發上契第一枚貯以韋囊緘印之遣指揮齎牒同往所在驗契合卽發兵

三年
興居自殺

西京雜記興居始舉兵大風直東來直吹其旌旗飛上天入雲而墜城西井中馬皆悲鳴不進左右李廓等諫不聽後卒自殺

四年復諸劉有屬籍家

鄭司農鄉大夫職注貴者若今宗室皆復也

十二年無用傳

張晏曰過所者周官司關注云傳如今移過所文書釋

名示示也過所至關津以示也

御覽五百九十八文部有過所門引釋名曰過

所至關津以示戒

魏志倉慈傳遷敦煌太守西域胡欲詣洛者

爲封過所唐衛禁律諸不應度關而給過所及冒名請

過所而度者各徒一年冊府元龜

一百九十一

偽梁開平四

年詔司門過所先頒經中書門下點檢宜委宰臣趙光逢專判出給如淳云兩行書縮帛者乃周官小宰質劑鄭云兩書一札同而別之今之券書釋名莧別也大書中札中破別之也此又同周官之傳別以帛書故終軍傳亦謂之繻今則謂之路引

十四 年 殺北地都尉印

新唐書宰相世系表段氏出自姬姓漢有北地都尉印徐廣云姓段者譜牒相承久矣不能盡與史合然今本史記注所引徐廣說則云姓孫或者妄人轉據阿顏說

改之

年十五黃龍見於成紀

冊府元龜又云日中有王字玉海一百九十五望氣經文帝

時日中有王字

後二年結轍於道

史記作結軼莊子天地篇螳螂怒臂以當車軼國策轍多作軼

六年中大夫令免

索隱云顏遊秦以令是姓免是名據荀悅漢紀令免作

李勉

屯飛狐

集解引蘇林在上黨者誤元和志自蔚州飛狐縣北入
嬀州懷戎縣界卽古飛狐口劉琨自代出飛狐口奔於
安次亦謂此道明史地理志飛狐峪在山西蔚州廣昌
縣北今爲里石嶺堡

蔚州志飛狐口在州東南六十里北口在州南三十里

屯句注

歐陽忞輿地廣記代州雁門縣有句注山漢擊匈奴於
此一名西陁山方輿紀要在代州西北二十五里一名
句注陁

次細柳

御覽

百九

三輔故事曰周亞夫軍於細柳今石激是也

石激西有細柳倉元和志細柳倉在咸陽縣西南二十

里周亞夫軍細柳此是

又細柳原在長安縣西南三十三里別是一細柳

按張

揖云在昆明池南者則長安之細柳原非也

次棘門

長安志棘門在咸陽東北十八里

七年損其飲食絕鬼神之祭祀

觀此則知彼時大喪猶循倚廬食粥三年不祭之制雖遭大亂周公之禮不廢也

朕之不明與嘉之

按如淳說是也朕雖不明猶以爲善深幸其考終命

服臨者皆無踐

伏儼云踐翦也者書序成王踐奄鄭讀踐爲翦玉藻凡有血氣者弗身踐也注云踐當爲翦翦猶殺也釋名三年之綴曰斬不緝其末直翦斬而已故伏儼以翦爲斬衰也此漢人古義魏晉而下卽有所不知師古何足論乎

大紅十五日小紅十四日纖七日

自大紅小紅而纖凡三十六日皆謂旣下墮漸卽吉如古受服之義服言大功小功布者是也閒傳中月而禪

之而織注黑經白緯曰織疏云禪祭旣訖而首著織冠
身著素端黃裳以至吉祭黑經白緯曰織者戴德變除
禮也練服衣黃裏縗緣與其冠皆縗緣豈有大紅小紅
之異應劭說乃無稽矣唐書崔祐甫傳常袞與禮司議羣臣喪服漢文權制猶三十六日太宗崩遺詔亦三十六日而羣臣延之旣葬而除約四月也按袞此議尙有古意崔祐甫乃據遺詔三日釋服一同吏民之例全乖分義袞以此橫遭貶斥祐甫公代其位史不以爲非蓋禮廢久矣

贊 身衣弋綈

後書王符傳引前書音義曰弋厚也集韻黠阜也廣韻
又作祀云黑衣以弋爲阜者據賈誼言白衣阜綈疑阜
亦帛之誤說文綈厚繒也云弋厚者是也何必定以黑

色爲衣古今注文帝履不借視朝

治霸陵

長安志在萬年縣東十里白鹿原上晉書索綝傳三秦人盜發漢霸杜二陵多獲珍寶愍帝問綝曰漢陵中物何乃多也綝對曰漢天子卽位一年而爲陵天下貢賦三分之一供宗廟一供賓客一充山陵漢武帝享年久長比崩而茂陵不復容物其樹皆已可拱赤眉取陵中物不能減半於今猶有朽帛委積珠玉未盡此二陵是儉者耳按此云治霸陵皆瓦器而仍有珍寶蓋帝旣崩臣子違其素志耳

常假借納用焉

風俗通

正失篇

孝成帝問劉向曰後世皆言文帝治天下

幾至太平其德比周成王此語何從生向對曰生於言
事文帝禮言事者不傷其意羣臣無小大至卽從容言
上止輦聽之其言可者稱善不可者喜笑而已言事多
褒之後人見遺文則然

幾至刑措

論衡藝增篇光武皇帝之時郎中汝南賁光上言孝文
皇帝時居明光宮天下斷獄三人頌美文帝陳其效實
光武皇帝曰孝文皇帝時不居明光宮

武帝太初四年
秋起明光殿

積善修德美名流之是以君子惡居下流

景帝紀弟五

丁未太子卽皇帝位

何焯曰文紀以乙巳葬旣葬乃卽位也史記云太子卽位於高廟此皆典禮所徵不宜削略按公羊傳正棺於兩楹之間然後卽位後世柩前卽位之制乃用公羊說此尙近古

詳續禮儀志

元年飲食計償費勿論

唐職制律諸監臨之官受豬羊供饋坐贓論強者依強取監臨財物法

強乞取者準枉法論此唐律重於漢

賣故貴皆坐賊爲盜

唐律若賣買有賸利者以乞取監臨財物者有賸利者

計利準枉法論

枉法十五匹絞

受其故官屬所將監治送財物

唐律諸去官而受舊官屬士庶饋與若乞取借貸之屬各減在官時三等

奪爵爲士伍免之

按漢二千石卒於官乃有法賻則遷免者不得也此與見監治受財物者異科以其遷替非威力所劫但官屬送財自不應受耳故惟奪爵而免坐賊也師古乃云奪

爵爲士伍又免其官職按漢法初罪免官重論奪爵已奪爵矣免官何待言乎不通之人著語便錯

二年二十始傳

本年十五以上今寬假之至年二十始出算錢傳謂著於版籍小宰鄭司農注云傳之著約束於文書師古說年二十三爲正卒非此制也

太皇太后崩

此與中三年正月皇太后崩蓋一事而錯出彼文又脫一太字

令田半租

文帝十三年除田租稅此以新卽位國用不足故復半

出租賦

年三
謀反欲以殺嘉

當是忤說先謀反發覺後復妄扳其父爲知情故上云
不孝晉灼義是也師古謂私怨其父而謀反欲令連坐
此豈人情俗所云服毒藥虎乃師古意

年四
十月戊戌

何焯曰此十月或九月之訛史記是年有後九月

年五
作陽陵邑

長安志景帝陽陵在咸陽縣東十五里帝王世紀曰陽

陵山方一百二十步高四十丈

七年二月罷太尉官

史記丞相青免二月乙巳以太尉條侯周亞夫爲丞相
中元年周苛周昌孫子爲列侯

史記周苛孫平爲繩侯周昌子左車爲安陽侯

二年奏謚誅策

奏謚誅者謂諸侯王薨列侯薨若河間獻王薨大行令
奏謚是也策者指列侯初封諸侯太傅初除者用策命
也應劭通解爲哀策則初封初除之文無據矣漢之策命猶唐
宋之誥命也宋史職官志中書省定臣僚封贈父母依舊制命詞太中大夫觀察使以上用專詞餘用海詞

穿復土

詩傳陶其土而復之箋云復者復於土上疏云復者地上爲之取土於地復築而堅之

四年起德陽宮

謂廟爲宮此古義也春秋經傳毛詩皆然以周有文武世室魯有魯公武公世室故爾雅又云宮謂之室皆謂廟也瓚云諱廟言宮文帝何以不諱而賈誼直云願成廟乎此不通雅故妄說長安志景帝廟在咸陽縣東北十五里

齒未平不得出關

酉陽雜俎馬四歲兩齒至二十歲齒盡平程瑤田通藝

錄錢唐丁晞曾著馬字說云馬之初生已有齒上下各

六曰乳牙

齊民要術相馬法一歲上下生乳齒各二

以吮乳得名形小而色

白厥後迭毀迭生數皆以兩曰草牙以嚼草得名形大

而色黃嚼草久則齒端凹如臼已而凹者復平齒加長

矣乳時力弱不中乘能嚼草則力強齒平則老市馬者

鑿其平齒令凹服虔謂十歲齒平則凹如臼者十歲以前

者也按呂覽淫辭篇高誘注馬上下齒十二牙上下十

八合爲三十則齒是其當唇者可其左右頰者也三十

之數爲馬齒之最長馬齒齊則平矣此又一說也

六年朱兩轡

續志轡長六尺下屈廣八寸上業廣尺二寸中二千石以上右駢

朱左轡

續志景帝中元五年始詔六百石以上施朱轡得銅五末軛有吉陽箒

至武泉

一統志武泉故城在朔平府右玉縣西北塞外括地志在朔州北二百二十里

後元
年
讞者不爲失

宋李元綱厚德錄故事州郡之獄有疑及情可憫者雖許上請而法寺多舉駁則官吏當不應奏之罪故皆移情就法不以上請燕肅判刑部奏天聖三年天下斷大辟二千四百三十六豈無法疑情可憫者而州郡無所奏讞蓋畏罪也請自今奏而不應奏者不科以罪自是左讞者歲不減千人皆情可憫法疑者無不貸免

後二年
亡爲非者寡矣

說苑反質篇魏文侯問李克曰刑罰之源安生李克曰生於姦邪淫佚之行以下語皆與此詔上文同又六韜上賢篇雕文刻鏤技巧而傷農事王者必禁管子七臣

七主篇文采纂組燔功之審也

訾算十以上

說苑正諫篇齊景令則跪倍資無征則訾算之謂也鹽

鐵論

錯幣

春秋曰算不及蠻夷按十八算爲貲十萬則司

馬相如先亦富人也

後三年

若取庸采黃金珠玉者

唐職制律諸監臨之官私役使所監臨各計庸貸

借使人功

計庸日準絹三尺

以受所監臨財物論又擅興律諸丁夫雜匹

在役而監當官私使者計庸準盜論

武帝紀弟六

七歲爲皇太子

御覽

八十

漢武帝故事曰

通典刑雜議引此事

漢景帝時廷尉上

囚防年繼母陳論殺防年父防年殺陳依律殺母以大逆論帝疑之武帝時年十二爲太子在旁帝遂問之太子答曰夫繼母如母明不及母緣父之故比之於母今繼母無狀手殺其夫則下手之日母恩絕矣宜與殺人者同不宜以大逆論

建元
元年復甲卒

漢官舊儀民年二十三爲正一歲以爲衛士一歲爲材官騎士

衛士住京師材官騎士住本郡

八月太守都尉令長相丞會都

試課殿最水家爲樓船亦習射戟行船年五十六衰老乃得免爲民就田此所謂甲卒也蓋爲卒又自出甲營之類耳

爲復子若孫

漢最重復除故民爵不得過公乘以五大夫當復除也前此文景雖申養老之典未有復卒之令然必至九十而復其子孫則邀恩者亦鮮矣唐六典凡庶人年八十及篤疾給侍丁一人九十給二人百歲三人皆先盡子孫次取近親次取輕色丁冊府元龜五十貞觀十一年詔百歲以上者給侍人五立宗開元二年九月引京師侍老飲於合元殿

九十以上賜几杖八十以上賜鳩杖其諸州侍老州縣

穩便設酒食一準京城賜几杖婦人則送几杖於其家

又八十六天寶八載制天下百姓大夫七十五以上婦七十

以上宜各給一人充侍仍自揀擇至八十以上依常式

處分按此則老者無不給侍矣若自百歲以下版授刺

史司馬縣令

六十以上版授本縣丞

此制起自元魏未免太濫

白氏

長慶集曹州別駕張公碑調杭州錄事參軍駁假年侍老者三十人

河海潤千里

公羊

僖三十一年

傳山川有能潤於百里者天子秩而祭之

河海潤千里

二年初置茂陵邑

長安志茂陵故城在興平縣東北十九里周三里三輔

舊事曰武帝於槐里茂鄉徙戶六萬一千置茂陵縣

十道

志武帝時徙戶居之至宣帝時爲縣

陵高十四丈通典每天子卽位明年

將作大匠營陵地用地七頃方中用地一頃深十三丈

堂壇高三丈墳高十二丈武帝墳高二十丈明中高一

丈七尺四周二丈內梓棺柏黃腸題湊以次百官藏畢

其設四通羨門容大車六馬皆藏之內方外陟車石外

方立先閉劔戶戶設夜龍莫邪劔伏弩設伏火以營陵

餘地爲西園后陵餘地埏好以下次賜親屬功臣

元和志漢

徙關東豪族以奉陵邑長陵茂陵
各萬戶其餘五千戶皆屬太常

三
年初作便門橋

元和志便橋在京兆府咸陽縣西南十里架渭水上在
長安北茂陵東去長安二十里長安城西門曰便門此
橋與門對因號便橋按師古云平便同字攷說文采古
辨字與平字篆作飛者迥別古訓辨便通耳非以平爲
便也

詳見後書劉
愷傳疏證

師古妄作解事

廢遷防陵

一統志房陵故城今鄖陽府房縣治

元光
元年郡國舉孝廉

冊府元龜

六百四十三

貞觀十八年詔諸州所舉孝廉十有

一人並以不能對問放還其舉主以舉非其人罪論加一等寶應二年六月禮部侍郎楊綰奏諸州每歲貢人依鄉舉里選察秀才孝廉敕旨州縣每歲察孝廉取在鄉閭有孝弟廉恥之行薦焉委有司以禮待之試其所通之學五經之內精通一經兼能對策達於禮體者並量行業授官德宗建中二年六月敕孝廉科宜停

自是以後

秀孝路絕時稱業明經者爲孝廉業進士者爲秀才

明太祖洪武六年下詔罷科

舉亦有孝廉秀才之目旋凌替不行崇禎九年吏部復議舉孝廉由司道以逮巡按覆核疏聞驗試錄用於是

薦舉徧天下然皆授以殘破郡縣卒無大效

明史選舉志

今

亦有孝廉方正之舉然多避不就試而選濫矣

北發渠搜

王會解發人應應者若鹿迅走注發亦東夷

管子發度發朝鮮之

文皮此東夷之證

大戴五帝德篇北山戎發息慎又少閒篇海

外肅慎北發渠搜氏羌來服

凡三見

盧辯注北發北狄地

名其地出迅足鹿卽以王會解爲說也武帝詔正用其

文而薛瓌反據三朝記以南撫北發對舉爲證蓋誤記

五帝德上文有南撫交趾大教語爲三朝記

少閒卽三朝記之一

不知三朝記正以爲國名也然公孫弘傳新序

雜事一並

有北發渠搜南撫交阯蓋古語習謬已久師古評擇諸家率多舍核取謬又禹貢正義引鄭注衣皮之民居此昆崙析支渠搜三山之野者皆西戎也鄭以昆崙析支例之則渠搜是山名也戴震水地記涼土異物志曰古渠搜國在大宛北界據是言之河源已南唐吐蕃今西藏之境古昆崙國積石已東北今青海之境古析支漢通大宛西域踰蔥嶺而西古渠搜在焉

董仲舒公孫弘等出焉

通鑑考異曰仲舒傳云仲舒對策推明孔氏抑黜百家立學校之官州縣舉茂才孝廉皆自仲舒發之今舉孝

廉在元光元年十一月若對策在下五月不得云自仲舒發之蓋紀誤也然仲舒對策不知果在何時惟建元元年見於紀故著之洪邁容齋續筆曰按策問中云朕親耕藉勸孝弟崇有德使者冠蓋相望對策曰陰陽錯謬氛氣充塞羣生寡遂黎民未濟必非卽位之始年也愚按本傳董仲舒於孝景時爲博士武帝卽位舉賢良文學則仲舒對策實在建初元年無可疑者又建元六年遼東高廟災高園便殿火五行志仲舒對曰云云本傳在中廢爲中大夫時居家推說其意是賢良對策不得反在元光元年也又按公孫弘傳武帝初卽位年六

十以賢良徵嚴助傳武帝善助對擢助爲中大夫則三人者皆同歲舉也弘後爲博士免歸元光五年復徵賢良俱非元光元年事

三
年
救決河

西京雜記瓠子河決有蛟龍從九子自決中出逆上入河噴沫流波數十里

起龍淵宮

此武帝所自作廟服虔如淳說是也御覽帝王世紀曰孝武廟名龍淵長安志漢武帝龍淵廟在興平縣東北十七里元和志漢龍泉廟在興平縣東北二十四里水

經注

謂水篇

成國故渠又東逕龍泉北渠北故阪北卽龍

淵廟又云衛縣河南有龍淵宮蓋武帝起宮於決河之
旁龍淵之側故曰龍淵宮此亦本如淳所云溝洫志救
河決起龍淵宮於其旁愚考溝洫志無龍淵宮自河決
瓠子後二十餘載築宣防宮在元封時非此年也如淳
誤耳假若有之卽是武帝崩後郡國行幸處所作原廟
仍龍淵故名非此龍淵宮也至孟康泛引西平界之龍
淵元和志蔡州西平縣有龍泉水可以淬刀劍與河決東郡處邈焉懸隔師
古誤連上文救決河爲讀又信孟康之說此孔穎達所
云尙不能離經辨句復何須注述大典者也

五年河閒王德薨

史記五宗世家注漢名臣奏杜業奏曰河閒獻王經術
通明積德累行天下雄俊眾儒皆歸之孝武帝時獻王
朝被服造次必於仁義問以五策獻王輒對無窮孝武
帝翫然難之謂獻王湯以七十里文王百里其勉之王
知其意歸卽縱酒聽樂因以終

元朔元年進賢受上賞

鵠冠子道端篇進賢受上賞則下不相蔽

迺加九錫

應劭所云出韓詩外傳

禮舍文嘉亦有之
乃韓詩外傳

遂爲莽操篡

竊之階張晏據周禮但有九命是也尚書大傳曰有功者天子一賜以車服再賜以韍纁三賜以虎賁百人號曰命諸侯得專征與周襄王賜晉文公者悉同古之錫命如斯而已傳記雜說蓋參同周官春秋傳而傳之附上罔下者死附下罔上者刑典聞國政而無益於民者斥在上位而不能進賢者退

說苑臣術篇引太誓與此四語同此文太誓也馬融所致疑者五事而趙岐云後得者今偽泰誓悉據馬融列者補入乃轉漏此語

九變復貫知言之選

列子天論易變而爲一一變而爲七七變而爲九九變者究也乃復變而爲一莊子天道篇古之語大道者五變而形名可舉九變而賞罰可言也

年二
西至符離

方輿紀要符離塞在豐州河西北一統志豐州故城在鄂爾多斯右翼後旗界內

置朔方五原郡

一統志朔方故城在鄂爾多斯右翼後旗界內前漢郡治三封三封故城在套外黃河西岸九原故城在吳喇忒旗北五原郡治九原縣

三
年
內長文

鹽鐵論滅秦篇周室修禮長文然國翦弱按劉昌詩蘆浦筆記云魯氏載章子厚家藏古本漢書內長文乃是而肆赦蓋而誤爲內肆赦皆缺偏旁詔云其赦天下意甚明按此張晏解實是內長文此必讀者嫌其難曉而改未可信也王應麟曰或云古寫本無注

六
年
無所流馳

說文馳遂子也蓋後人通以馳爲駝耳今官誥馳贈父祖如應劭說作一重解不通

元符
元年
淮南王安衡山王賜謀反誅

按淮南傳謀反在元朔六年秋紀特以與衡山事相繼故同在是年冬也

毋贅聚

公羊隱元年傳會猶最也何休注最聚也若今聚民爲投最方言萃雜集也東齊曰聚按最贅萃聲同一義也管子山至數大夫不鄉贅合游者謂之無禮義說苑奉使梁王贅其羣臣而議其過

二年馬生余吾水中

應劭云在朔方北按公孫敖擊匈奴至余吾匈奴傳云匈奴聞公孫敖出悉遠其累重於余吾水北則其水在

匈奴之北邊彼水生馬何關漢事而史記之乎水經注
榆次縣故涂水鄉晉大夫智徐吾之邑明志太原府榆
次縣東南有涂水又有小涂水流合焉

能言鳥

唐書音樂志嶺南有鳥如鸚鵡而稍大乍視之不相分
辨籠養久則能言無不通南人謂之吉了亦云料開元
初廣州獻之音雄重如丈夫委曲識人情慧於鸚鵡武
帝本紀南越獻能言鳥注漢書者皆謂鳥爲鸚鵡若是
鸚鵡不得不舉其名而謂之能言鳥鸚鵡秦隴尤多亦
不足重所謂能言鳥卽吉了也

嶺表錄異客管廉白州
產秦吉了大約如鸚鵡

嘴腳皆紅兩眼後夾腦有黃肉冠善
效人音語言雄大分明異於鸚鵡

及公孫敖張騫

廣軍自當亡賞非後期也文當云張騫及公孫敖誤安
及字於上

置五屬國以處之

通鑑地理通釋地理志安定治三水上郡治龜茲天水
治勇士五原治蒲澤張掖治日勒此武帝初置五屬國
也若金城西河北地屬國置於宣帝時不在五屬國數
年五平牡馬

質人職注質劑若今月平賣也釋文平皮命反

元鼎
元年 廢徙上庸

一統志上庸故城在鄖陽府竹山縣東南

二年 火耕水耨

火耕者刈稻了燒其稊以肥土然後耨之稻人職夏以
水殄草而芟夷之齊民要術二月冰解地乾燒而耕之
仍卽下水十日地既散液持木斫平之納種稻苗長七
八寸陳草復起以鎌侵水芟之草悉膿死稻苗漸長復
須耨

四年 周子南君

師古子南封邑之號尤朮說也鹽鐵論

誅秦篇

大夫曰先

帝大惠紹興其後封嘉潁川號周子南君南與男通用

昭十三年傳子產曰鄭伯男也周語富辰曰鄭伯南也

禹貢二百里男邦孔傳云男任也白虎通云南之爲言

任也

惠棟曰王肅家語注亦載子產語云男南古字通用

公羊傳小國稱伯子男

又云春秋伯子男一也董子

三代改制

商合伯子男爲一等

周爵五等春秋三等

何休云春秋改周之文從殷之質合伯子男爲一

又云杞

稱子又稱伯何見殊之小國也武帝時春秋惟用公羊

故周子南君之號从公羊杞子伯之比直以子男并爵

不取男服甸名戰國時周之別封稱東周君西周君衛

元君亦自侯降號爲君漢制未爲徹侯而食邑者亦稱

君

馬生渥洼水中

說文注深池也蓋今花海之地在嘉峪關方輿紀要志云沙州境有渥洼水

五
年祖厲河

玉篇祖子邪切縣名

字从衣
不从示

水經注河水東北流逕安

定祖厲縣城西北祖厲川水出祖厲南山西北流注於

河明志靖虜衛西南

今寧夏
府地

有祖厲河東北有亥刺河

皆注於大河一統志祖厲河在鞏昌府會寧縣南本名庫全河亦名南河又西北逕靖遠縣界爲祖厲河下流

入黃河

十一月辛巳朔旦冬至

錢大昕曰自是年至太初元年相距八歲中積二千九百二十二日冬至當在癸亥不得到甲子再以月法求之得積月九十八又二十七日有奇冬至當在十一月二十八日未得置閏於天正前也若用太初之元則辛巳之冬至又後天一日史家特據當時所頒之朔書之耳律厯志載元朔六年甲申朔旦冬至乃太初改厯後逆推之當時未必以爲章首也

修天文禮

說文禪祭天也無禪字祭法注王宮日壇夜明亦謂月壇疑壇訛

奪爵者百六人

通典丁孚漢儀曰酎金律文帝所加以正月朝作酒八月成名酎酒因令諸侯助祭貢金漢律金布令諸侯列侯各以人口數率千口奉金四兩奇不滿千口至五百以下者皆助酎少府受之又九真交阯日南則用犀角二長九寸以上若玳瑁申鬱林邑用象牙長三尺以上若翠各二十準以當金按續志注丁孚漢儀云不滿千口至五百口亦四兩

樓船將軍楊僕出豫章

按僕於元鼎五年始爲將軍是年破南越封侯而函谷關之徙在三年前此未嘗有戰功酷吏傳僕數有大功恥爲關外民上書乞徙東關者殆虛妄也

下牂柯江

一統志牂柯江在貴陽府定番州南一名都泥江源出州西北三十里亂山中曰濛潭經州南界地名破蠶又南入廣西泗城州界名勝志牂柯江南流入泗城界爲右江至潯州與左江合下番禺入南海

六年征西羌平之

後書西羌傳時先零羌與封養牢姐種解仇結盟與匈奴通合兵十餘萬其攻令居安故遂圍抱罕漢遣將軍李息郎中令徐自爲將兵十萬人擊平之始置護羌校尉持節統領焉

李左邑桐鄉

一統志左邑故城今絳州聞喜縣治元和志桐鄉故城在今聞喜縣西南八里

元封
元年 啟母石

藝文類聚六 隨巢子曰啟生於石御覽三十 嵩高山記

曰昔有婦女任身三十月生子五歲便入嵩高山學道

通神明爲母立祠號開母祠又有三臺山漢武東巡過

此山見三學仙女遂以爲名

又一百三十五

山海經曰大室嵩

高陽城西啟母化爲石在焉

按中山經郭璞註語非經

唐崔融啟母

廟碑記云顧野王輿地志盧元明嵩山記以爲陽翟婦

人卽上文嵩高記所稱是也按漢開母廟石闕銘云九

山甄旅爰納漢山辛癸之閒則固以爲塗山氏也

師古說此

事云見淮南子按人閒訓僅云禹生於石注云修己感石而生禹拆胸而出別無塗山氏事師古妄說

御史乘屬

晉書職官志侍御史二漢所掌有五曹其五曰乘曹掌

護駕輿服志護駕御史騎夾左右漢舊儀御史吏員凡

三百四十一人分爲吏

當作吏

少史屬按漢之曹吏有掾

有屬見漢碑者不一

呼萬歲者三

呂覽

過理

宋王飲酒室中有呼萬歲者堂上盡應堂上已

應堂下盡應門外庭中間之莫敢不應齊策馮煖燒責
券民稱萬歲

肩然如有聞

爾雅釋言僛聲也釋文音肩玉篇僛小聲也

其以十月爲元封元年

此十月卽年頭之十月自此以上至建元皆追改紀年

之元郊祀志所載尙未明了劉氏論之詳矣

博奉高蛇邱歷城梁父

一統志博縣故城在泰安府東南梁父故城在府南六
十里奉高廢縣在府東北十七里蛇邱故城在泰安府
肥城縣南歷城縣今濟南府治

至碣石

水經注瀾水又東南至桑縣碣石山今枕海有石如甬
道數十里當山頂有大石如柱形往往而見立於巨海
之中潮水大至則隱及潮波退不動不沒世名之天橋
柱也韋昭亦指此以爲碣石也明志直隸永平府昌黎

縣西北有碣石山明統志在昌黎縣西北五十里

二年冬

西京雜記元封二年大寒雪深五尺野鳥獸皆死牛馬皆蟠縮如蝟三輔人民凍死者十有二三

甘泉宮內中

論衡別通篇富人之宅以一丈之地爲內內中所有繅布絲帛貧人之宅亦以一丈爲內內中空虛韓非內儲說李季妻私有通於士季突至士在內中妻患之則內中者謂臥房也

三年角抵戲

李斯傳二世在甘泉方作戲抵俳優新書匈奴篇上卽
饗胡人大觥抵也則角抵不始於武帝御覽七百五漢

十五

武帝故事曰角抵戲六國所造秦并滅天下而增廣之
漢興雖罷然猶不都絕上復采用之任昉述異記秦漢
閒說蚩尤氏耳鬚如劒戟頭有角與軒轅闕以角觝人
人不能向今冀州有樂名蚩尤戲其民兩兩三三頭戴
牛角而相抵漢造角抵戲蓋其遺製也通典一百四散
樂後魏道武天興六年增修雜戲造五兵角觝

年四
通回中道

元和志秦回中宮在鳳翔府天興縣西按後書來歙與

征虜祭遵襲略陽伐山開道從番須回中徑至略陽是
時祭遵屯於汧汧與雍相連是回中道與回中宮初非
異處宮以地得名耳郡國志汧縣有回城名回中劉昭注來
歙開漢武由此道北至安定蕭關寰宇記蕭關故城在
原州平高縣東南三十里明志隴州西北有回城亦曰
回中又西北有回中宮又有番須口卽隴山口而原州
平高乃今之固原州蕭關在其東南安得云北通蕭關
乎師古謬妄

懸獨鹿鳴澤

水經注洛水上承鳴澤渚渚方十五里漢武帝元封四

年行幸鳴澤者也方輿紀要獨鹿山在涿州西十五里下有鳴澤

年五至於盛唐

通典壽州盛唐縣隋霍山縣天寶中改焉

新唐書地理志開元二十

七年

又割盛唐縣置霍山

輿地廣記宋開寶四年改爲六安

是唐取漢

故名文潁云在廬江界是也韋昭所云乃後漢武陵郡作唐縣吳屬南郡晉屬南平者非此也寰宇記六安縣西二十五里有盛唐山因爲縣名於漢爲潛縣地

自尋陽浮江

一統志大江自湖廣黃梅縣東流入逕安慶府宿松縣

南一百二十里對岸爲江西湖口彭澤縣界方輿紀要
輿程記自九江府北渡大江廣二十里有太陽廟又四
十里爲黃梅縣東北百餘里則宿松縣矣沈約曰潯本
水名在江北南流入大江因以縣名而江遂得潯陽之
稱

射蛟江中獲之

一統志射蛟浦在九江府湖口縣東南十里

薄樅陽

寰宇記樅陽故城在舒州桐城縣東南一百里縣志今
有樅陽上下鎮一統志樅陽河在縣南一百二十里今

曰練潭湖

亦在御之而已

墨子親士篇良馬難乘可以任重致遠良才難令然可以致君見尊

六年作首山宮

黃圖武帝封禪後夢高祖坐明堂朝羣臣於是祀高祖於明堂以配天還作首山宮以爲高靈館按此似在甘泉宮也然首山在河東或又說是

太初元年禮高里

元和志高里山在兗州乾封縣西北二十五里亦曰蒿

里一統志在泰安府西南三里又名亭傳山師古以爲
死人之里自作蓬蒿之蒿按玉篇薨里黃泉也死人也
說文呼毛反經典爲鮮薨之字內則注云薨乾也蓋
死則槁乾矣以蓬蒿字爲蒿里乃流俗所作耳

受降城

一統志漢受降城在吳喇忒旗北

年二
臘五日

說文臘楚俗以二月祭飲食也一日祈穀食新曰離臘
韓非子五蠹山居而谷汲者臘臘而相遺以水則其節
令久矣錢大昭曰諸家以臘爲貍臘立秋時行之此臘

行於二月恐非其義按續志劉昭注亦兩事相混立秋之臘本作劉謂始殺也

三
年
禮
石
閭

一統志石閭山在泰安府四十五里

西北至盧胸

一統志盧胸河今名克魯倫河源出喀爾喀肯特山南直河套北二千里許

四
年
起
明
光
宮

程大昌雍錄漢明光宮有三一在北宮與長樂相連一在甘泉宮中一爲尙書奏事之地按尙書奏事明光殿

卽桂宮之明光宮非有二也

治武關

一統志武關山在商州東一百八十里接商南縣界州志關在山下當官道設關北接高山南臨絕澗

天漢二年止禁巫祠道中

周官男巫掌望祀衍杜子春云望衍謂祭也封禪書注索隱引李奇云三輔謂山陵閒爲衍是衍祭亦謂山陵閒之祭也卽野祭蜀志注諸葛亮初亡所在各求爲立廟朝議不聽百姓遂因時節私祭之者道陌上是則古者房祀尙少而野祭尤禁也

太始元年雲陵

此史家自後追書非誤一統志雲陵故城在邠州洧化縣北

麟趾襄蹠

爾雅翼穆天子傳賜曹奴之人黃金之鹿銀麇注云今有在地得玉狔金狗之屬此言古賂夷狄之貨也蓋古常有此瑞物故以金銀效而作之李石續博物志襄隨之閒故舂陵白水之地多得金麟趾襄蹠麟趾中空四旁有文刻工巧襄蹠似於平物上滴成如乾柿土人謂之柿子金或曰此襄敬所爲藥金和藥最良夢溪筆談一枚重四兩乃古之一斤也色有紫豔非他金可比以

刀切之柔甚於鉛雖大塊亦可刀切其中皆虛軟以石磨之則索索成屑康駢刺談錄李汧公鎮鳳翔有屬邑編氓因耨田得馬蹏金一甕

征和元年大搜上林

淮南天文訓冬七十二日壬子受制則閉門閤大搜客年耕於鉅定

明志青州府壽光縣西北有巨淀卽清水泊也一統志鉅定故城在青州府樂安縣北

後元二年五柞宮

西京雜記五柞宮有五柞樹皆連抱上枝陰覆數畝其

宮而有青梧觀觀有三梧桐樹下有石麒麟二枚長安志五柞宮在盩厔縣東南三十八里

贊 雄材大略

周祝解惟彼大心是生雄惟彼忌心是生勝武帝之謂矣

昭帝紀弟七

始元元年黃鵠下建章宮太液池中

西京雜記上爲歌曰黃鵠飛兮下建章羽肅肅兮行踰
蹌金爲衣菊爲裳嘖喋荷苻出入蒹葭自顧菲薄愧爾
嘉祥

鈎盾弄田

唐六典鈎盾署今掌供邦國薪芻之事按此則周禮甸師之職本掌耕藉有田地當在上林旁近以爲在未央宮非也

牂柯談指同並

方輿紀要牂柯今遵義府本朝改談拒城在遵義府

桐梓縣西南同並城在雲南曲靖府霑益州北

河內屬冀州河東屬并州

史記田仁傳仁爲丞相長史請先刺舉三河後此皆屬司隸地理志河內屬司隸郡國志河內河東並司隸所

部則是年改屬冀并權制也

年^二守長樂衛尉

時無太后而置東宮衛尉防姦宄

射士詣朔方

鹽鐵論

備胡

賢良曰今山東之戎馬甲士戍邊郡者絕殊

遼遠身在胡越心懷老母謂此也

年^五及馬弩關

新書壹通篇禁游宦諸侯及無得出馬關者豈不曰諸侯國眾車騎則力益多按馬不出關之制漢初已有也

罷權酤官

鹽鐵論

第十四

公卿奏曰賢良文學不明縣官事猥以鹽

鐵爲不便請且罷郡國榷酤關內鐵官奏可

以律占租

按此專指酒租也通考

十七

唐代宗廣德二年敕天下州

各量定酤酒戶隨月納稅按後唐明宗敕於夏秋田苗
上每畝納麴錢五文一任百姓造麴醞酒宋令民戶買
撲酒坊皆是以律占租之類

賣酒升四錢

按漢初酒賈如是至唐貞元二年每斗榷百五十錢則

民酤每斗不下二三百也

杜甫詩速宜相就沽一斗恰有三百青銅錢黃鶴曰眞宗

問唐時酒價丁宋史食貨志小酒每升價自五錢至三

十錢有二十六等大酒自八錢至四十八錢有二十三

等自政和以後屢增酒錢

通考紹興三年添酒錢每升作一百五十文

孝宗

乾道八年知常德府劉邦瀚言江北之民困於酒坊至

貧之家不捐萬錢則不能舉一吉凶之禮

葉適平陽縣代納坊場酒

錢記曰嘉定二年浙東提舉司言温州平陽縣鄉村坊

店二十五停閉二十有一酒錢以貫數二十六百七十

三州下青冊於縣月取歲足無敢墜跌保正賦斂戶

催乾沒關門逃避子孫不息愁苦不止蓋官自權賣酒課日增自非抑買

鉤町侯

方輿紀要句町廢縣在雲南臨安府通海縣東北五里

元鳳
元年武都氏人反

一統志武都故城在階州成縣西古白馬氏地

二年馬口錢

武帝令停畜馬故敎民出錢爲市直錫秣費也宋史兵志陝西等軍相與爲社每市馬官給直外社中復裒金益之曰馬社明勞堪憲章類編洪熙元年上諭民間畜官馬者令二歲納駒一匹著爲令明兵志其民牧皆視丁田而授馬始名曰戶馬旣名曰種馬牝牡五歲而徵駒馬虧欠納銀二兩孳生已闕官而復倒死納銀三兩隆慶二年言者令每馬折

價三十兩類解太僕凡所養每用種馬官盡變賣一馬
十兩直隸山東河南種馬十二萬匹得銀百二十萬兩
且收草料銀二十四萬部請養賣各半張居正爲相乃
盡賣之以銀輸寺折徵草料地租銀日益多以供團營
置馬

三輔太常郡得以菽粟當賦

顧炎武曰漢時田租本是菽粟今并口算雜徵之用錢
者皆令以菽粟當之其獨行於三輔太常郡者不獨爲
穀賤傷農亦以減漕三百萬石慮儲峙之乏也按下六
年亦令以菽粟當賦是非常制也

四年春正月丁亥帝加元服

大戴記孝昭冠辭曰陛下離顯先帝之光耀以承皇天

嘉祿欽順仲夏之吉日

注古者冠以仲夏此夏字爲春之訛

遵並大道邪

式秉集萬福之休靈始加昭明之元服推遠稚免之幼

志

注免猶弱也

崇積文武之寵德肅勤高祖清廟六合之內

靡不息陛下永永與天無極按譙周云周成王十五而

冠魯襄公十二年而冠晉侯曰國君十五而生子冠而

生子禮也

高誘淮南注歲星十二歲而周天天道十二而備故國君十二歲而冠冠而娶十五而生

子重國嗣也

故不從制今昭帝年十八而冠考東京諸帝和帝十

三安帝十六順帝十五並加元服後立皇后乃昭帝先

立后五年而後加元服此大臣不學廷臣未有諱其失
可怪也禮四時皆可冠故士冠禮云夏葛屨冬皮屨明
不專在春司馬彪禮儀志則以正月甲子若丙子和帝
獻帝
以甲子安帝以庚
子順帝以丙子據大戴及博物志昭帝冠本在二月
紀書正月誤耳

五年
罷象郡

錢大昕曰按武帝開南越置九郡無象郡地理志謂日
南卽秦象郡也此乃云罷象郡豈日南之外別有象郡
乎抑所罷者卽日南罷之未久而復置乎史無文以知
之按此云分屬鬱林牂柯者非日南郡也日南極遠不

得遙隸梓柯馬氏輿地考秦之象郡今合浦郡是也則是年罷象郡者罷合浦郡也

元平
元年葬平陵

長安志昭帝平陵在咸陽縣東北十三里漢書曰帝作陵制令流水而已石槨廣一丈二尺長二丈五尺無作墳陵東北作廡長三丈五步外爲小府裁足祠祀萬年之後掃地而祭

按三輔黃圖所言如此
宋敏求誤以爲漢書

宣帝紀第八

暴室嗇夫

師古云暴室職務旣多因爲置獄按武帝因獄囚傳逮

者故中都官署別置獄卽二十六所之一彼說非也

渙中翁

廣韻渙字注渙流又姓渙疑與伏同

蓮勺鹵中

隋志大業二年省蓮勺入下邳元和志漢故城在縣東
二十二里一統志蓮勺故城在西安府渭南縣北唐會
要^{十八}鹵地在京兆府奉先縣太和二年度支奏鹵池側
近百里取水柏柴燒灰煎鹽每石灰得一十二斤鹽舊
唐書食貨志朝邑小池在同州鹵池在京兆府奉先縣
並禁斷不樵明志蒲城縣西有西鹵池南有東鹵池舊

產鹽

輪獵車

曲禮注奇車獵衣之屬隱義曰獵車之形今之鉤車是也陳祥道禮書引此輪獵車當之按續志重輶緹輪繆龍繞之一曰闕豬車

本始元年鳳皇集膠東千乘

此鳳皇集之始論衡驗符篇宣帝時鳳皇下彭城彭城以間宣帝詔侍中宋翁一翁一曰鳳皇當下京師集於天子之郊乃遠下彭城不可收與無下等宣帝曰方今天下一家下彭城與京師等耳

四年
安邱濱于

一統志安邱故城在青州府安邱縣西南宸宇記在縣西南二十里卽莒渠邱邑齊乘濱于城在安邱縣東北三十里

地節
元年

風俗通正失是年天下斷獄四萬七千餘人

三年

古今注是年長安雨黑粟如禾

四年

減天下鹽賈

唐食貨志元和中鹽鐵使王播奏諸道鹽院糴鹽付商

人請每斛加五十通舊三百文價諸處煎鹽停場置小
鋪糶鹽每斛加二十文通舊一百九十文價宋史食貨
志顆鹽之直每斤自四十五至三十四錢有三等末鹽
之直每斤自四十七至八錢有二十一等

瘐死獄中

宋史刑法志神宗卽位詔曰獄者民命之所繫也比聞
有司歲考天下之奏而多瘐死深惟獄吏並緣爲姦檢
視不明使吾元元橫罹其害其具爲令應諸州軍巡司
院所禁罪人一歲在獄病死及二人五縣以上州歲死
三人開封府司軍巡司歲死七人推吏獄卒皆杖六十

增一人則加一等提點刑獄歲中會死者之數上之中

書檢察死者過多官吏雖已行罰當更黜責

按法至嚴而志云天

下之獄不勝其酷甚至戶婚詞訟亦皆收禁有飲食不充飢餓而死者有無力請求吏卒凌虐而死者懼其發覺先以病申名曰監醫實則已死名曰病死實則殺之唐斷獄律諸拷囚不得過

三度數總不得過二百杖若拷過三度及杖外以他法

拷掠者杖一百以故致死者徒二年又囚應請給衣食

醫而不請給者杖六十以故致死者徒一年卽減竊囚

食以故致死者絞冊府元龜

四十

後唐長興二年濮州

參軍崔琮請置病囚院兼加醫藥

元康元年

各二人

此詔丞相御史令各舉二人大司馬當亦如丞相御史
年二未有能稱朕意

此言吏於修身奉法並未能稱上意耳非謂己能修身
奉法而不稱其意也李斐師古解皆非

觸諱以犯罪者

唐職制律上書奏事誤犯宗廟諱者杖八十按唐律無
犯御名條則生存不諱也漢法重犯名諱者蓋以不敬

論

三
年
翱翔而舞

玉篇翔布翅飛高誘覽冥訓注翼一上一下曰翔不搖

曰翔

四年

古今注是年長安雨黑黍粟如禾

神爵
元年 伏飛

注如淳引呂覽荆有茲非得寶劍於干將按知分篇作
次非得寶劍於干隧

二年

夏五月羌虜降服斬其首惡大豪楊玉首非首

按趙充國傳明年五月充國奏請罷屯兵振旅還其秋
羌若零共斬先零大豪猶非楊玉首蓋充國以五月還
兵其時楊玉等未誅觀充國奏甚明紀作五月譌

年起樂游苑

長安志樂游廟在萬年縣南八里亦曰樂游原程大昌
雍錄曲江本秦隄州至漢爲樂游苑其地最高四望寬
敞

益吏百石以下奉十五

通典

職官
祿秩

應劭注漢書云張敞蕭望之曰夫倉廩實而

知禮節衣食足而知榮辱今小吏奉率不足常有憂父
母妻子之心雖欲潔身爲廉其勢不能請以什率增天
下吏俸什二

五年鳳丞相御史掾

漢官舊儀武帝元狩六年丞相吏員三百八十二人史
二十人秩四百石少史八十人秩三百石屬百人秩二
百石屬史百六十二人秩百石皆從同秩補御史職與
丞相參增吏員凡三百四十一人分爲吏當作史少史屬
亦從同秩補率取文法吏

甘露三年宿池陽宮登長平阪

元和志長平阪在涇陽縣西南五里池陽宮在縣西北
八里涇陽縣志阪在縣西南十里長安志長平阪俗名
睦城阪師古注作睦城坂未知孰誤

黃龍元年御史察計簿疑非罪實按之

漢官舊儀敕上計丞長史曰詔書數下布告郡國臣下承宣無狀多不究百姓不蒙恩被化守丞長史到郡與二千石力爲民興利除害務有以安之稱詔書有郡國茂材不顯者言上殘民貪汚煩擾之吏百姓所苦務勿任用方察不稱者

王良閣道

晉書天文志王良五星在奎北居河中其四星曰天駟一星曰王良閣道六星在王良前飛道也從紫宮至河神所乘也紫宮垣十五星一曰紫微大帝之座也天子之常居

元帝紀弟九

初元葬杜陵

元和志在萬年縣東南二十里

二年賜雲陽民爵一級

一統志漢泰時在雲陽之甘泉宮

嚴禦池田

廣雅釋器嚴翳也說文亦作嚴顏氏引說文乃刪竹作嚴耳

三年夏四月乙未晦

錢大昕曰五行志無晦字以三統術推之是歲四月乙

酉朔乙未乃月之十一日非晦日

五年周承休侯

方輿紀要承休廢縣在今汝州治子城東本曰周承休城元封三年封姬嘉爲周子南君邑於此元帝初元五年更置周承休侯國平帝元始四年更名爲邠光武改封姬常於東郡畔觀縣曰衛公以邠縣廢入陽城縣按邠平帝紀作鄭史傳無考

永光元年隕霜傷麥稼秋罷

按上文爲三月三月雪霜則傷麥稼其文甚明何關秋稼乎五行志九月二日隕霜殺稼此又一事也荀悅紀

三月隕霜殺麥苗夏無事秋七月己未大司馬車騎將軍史高免又百官表永光元年分諸陵邑屬三輔則秋罷者罷太常領陵縣或罷史高言爛脫失之是也師古傳會謬說

建昭元年
白蛾羣飛蔽日

蛾卽蟻之異文學記蛾子時術之注蛾蚍蜉也方言蚍蜉燕謂之蛾蚍釋蟲蟹飛蠃爾雅翼柱中白蠃之所化師古云蠃蛾非也

竟甯元年
葬渭陵

長安志渭陵在咸陽縣東北十三里

贊 貢薛韋匡迭爲宰相

貢禹薛廣德僅爲御史大夫亦三公之列故得稱宰相
師古竟日以丞相又誤以韋元成爲韋賢

優游不斷

韓非子亡徵緩心而無成柔茹而寡斷好惡無決而無
所定立者可亡也

成帝紀第十

生甲觀畫堂

應劭所言指產舍也畫九子母者應劭所目知玉海晉
宮闕名洛陽宮有螽斯堂則百堂

晉五行志太元十三年螽斯則百堂災時

張夫人驕皇子不蕃乖螽斯則百之道故災其殿 蓋類此

建始二年削樊

一統志樊縣故城在兗州府滋陽縣西南

河平四年在所冗食之

管子問篇冗國所開口而食者幾何人

陽朔二年五阮關

淮南紀論北至飛狐陽原注或曰陽原代郡廣昌東五

阮關是也廣昌今蔚縣方輿紀要天井關在澤州南四十五

里當太行絕頂其南卽羊腸坂道壺關山在潞安府東

南十三里山形似壺故置關於此紫荆關在代州廣昌

縣東北百里或曰卽古之五阮關

鴻嘉四年輒籍內

以無過所本不聽入令簿籍之

永始元年其罷昌陵及故陵

陳景雲曰及當作反反故陵謂仍還渭城延陵

三年李譚等五人共格殺並

錢大昕曰功臣表只有李譚稱忠鍾祖訾順四人

四年長樂臨華殿

黃圖在長樂宮前殿後武帝建

元延元年大司馬大將軍王商薨

元后傳商初爲衛將軍輔政乞骸骨天子更以爲大將軍故荀悅紀據表書此據傳書也

綏和元年成湯受命列爲三代

錢大昕曰王者存二代之後并當代爲三漢承周周承殷故以殷周爲二王後并漢爲三代也若并夏爲三代何不兼求夏後封之故知此文與他處義別顏說非是大將軍

大字衍荀紀無大字

賜貴人許氏藥

按貴人者雖無位號猶異凡庶也始見於李夫人傳後

漢乃以爲次王后之號此藥字衍

二年葬延陵

長安志延陵在咸陽縣西北十五里

哀帝紀第十一

襪繫解

漢時禮服猶用履舄其襪亦與今稍異蓋不爲鞞只以帶纏縛於足踝也韓非外儲說左文王伐崇至鳳黃墟襪繫解因自結格致鏡原身章撮要襪以緋羅爲表緋絹爲裏著以穿履有帶與今之制不同

有司無得舉赦前往事

唐關訟律諸赦前事相告言者以其罪罪之按此詔蓋爲司隸解光奏趙氏事發也

漏刻以百二十爲度

百刻分配十二時一時得八刻二十分今以百二十刻則一時得十刻也五代會要晉天福三年司天監奏漏刻經云晝夜一百刻分爲十二時每時有八刻三分之一六十分爲一刻一時有八刻二十分隋書天文志梁武帝天監六年武帝以晝夜百刻分配十二辰辰得八刻仍有餘分乃以晝夜爲九十六刻一辰有全刻八焉本朝時憲書用其法每時均八刻每刻十五分無大

刻大刻之別

非赦令也皆蠲除之

赦令不可追改故不在蠲除之限

元壽元年婁敕公卿

釋言婁亟也詩式居婁驕釋文王肅力佳反數也正義婁爲數乃常訓也故別爲毛說韻會今之婁字本是屢空屢字後人所加从尸未詳

二年

東觀記梁統封尙書狀曰元壽二年三輔盜賊羣輩並起至燔燒茂陵都邑煙火見未央宮前代所未嘗有其

後隴西辛興北任橫任崖西河漕況越州度郡萬里交
結或從遠方四面會合遂攻取庫兵劫略吏民國家開
封侯之科以軍法追捕僅能破散也按此記任橫事在
平帝元始中

葬義陵

元和志在咸陽縣北八里

贊 痿痺

如淳說頤腰按玉篇頤與膝同腰於卧切足跌也集韻
頤腰弩名頤腰兩足關也張弩必以足因爲弩名或作
蹶然頤腰弩卽蹶張弩也此喻兩足不丁之狀

平帝紀第十二

一切滿秩如眞

如淳云試守一歲乃爲眞者按公羊隱三年傳何休云時雖世大夫緣孝子之心不忍便當父位故順古先試一年乃命於宗廟漢法初除試守一歲卽眞循其義也

元始元年置義和官

百官表王莽改大司農曰義和後更爲納言此先置義和劉歆爲之蓋太史令之職

顧山錢月三百

按楊惲傳富郎出錢名山郎則女徒出錢名顧山其義

同也

中山苦陘縣

方輿紀要苦陘城在真定府無極縣東北二十八里

二年
盱台侯宮爲廣川王

錢云諸侯王表廣世王宮以易王庶孫盱台侯子紹封景十三王傳平帝時立建弟盱眙侯子宮爲廣陵王則紀文盱台侯下脫一子字廣川廣陵廣世紀表傳互有不同考廣陵胥緄而更紹至王莽時始廢不容更封若廣川國則其時已改爲信都以封楚孝孫景矣未必割其地以封宮也當從表作廣世爲是愚按世與川字相

似廣世之國無可考紀作廣川爲是紹封之王裁數千
戶何不可割之有

罷安定呼池苑爲安民縣

地理志安定縣屬鉅鹿郡非中山按袁宏後漢紀西誅
隗囂中郎將來歙兼領眾軍在安民水經注略陽川水
又西逕略陽道故城北建武八年中郎將來歙與祭遵
所部護軍王忠右輔將軍朱寵將二千人皆持鹵刀斧
自安民縣之楊城元始二年罷安定呼池苑爲縣者也
從番須回中伐木開道至略陽按其行兵之道則安民
縣屬安定郡無疑其縣西漢末置東漢初卽改并故兩

志俱未詳耳

續志注謝承書亦有宜民之說蓋卽安民傳寫訛

方輿紀要安民

縣應在平涼府華亭縣界

起五里於長安城

黃圖長安閭里一百六十室居櫛比門巷修直有宣明
建陽昌陰尙冠修城黃棘北煥南平等里

三年

御覽

七百十七

古今注曰平帝元始三年延陵西園神寢內

御戶座前大鏡皆清液如汗水出狀

縣道邑侯國曰校

隸釋溧陽長潘乾校官碑云構修學宮宗懿招德是縣

學名校也

學校置經師一人

唐六典赤縣令經學博士一人助教一人

五年駕一封詔傳

漢舊儀丞相掾屬以詔使案事御史爲駕一封行赦令

駕二封按漢以御史掌之唐六典門下省侍中若發驛

遣使則給其傳符會要

六十六

六典之制以監察第五御

史主郵驛大厯十四年門下省奏兩京請委御史臺各

定知驛使御史一人往來句當遂稱館驛使

臣不殤君

通典五經異義曰許君按禮云臣不殤君子不殤父君
無子而不爲立廟是背義棄禮罪之大者也

葬康陵

長安志在咸陽縣西二十五里舊圖經曰康陵在興平
原口

漢書疏證卷二

五

浙江書局刊

胡上襄校

金肇麒校

張大昌校